



## Fylkesmannen i Hordaland

Sakshandsamar, innvalstelefon  
Atle Kambestad, 55 57 22 12

Vår dato  
01.12.2009  
Dykkar dato

Vår referanse  
2009/6232 443.0  
Dykkar referanse

Grunneigarlag og sportsfiskarlag  
tilknytt vassdrag med laks og sjøaure

Etter adresseliste

### **Framlegg til ny forskrift for regulering av fiske etter laks og sjøaure i vassdrag i Hordaland. Høyring**

**Fylkesmannen i Hordaland sender med dette ut framlegg til ein ny femårs forskrift for regulering av fisketider med meir for laks og sjøaure i vassdrag i Hordaland. Frist for å kome med innspel til framlegget er 20.01.10. Fylkesmannen inviterar til dialog med rettigheitshavarane i høyningsperioden. Ny forskrift skal vere fastsett 15.02.10.**

Direktoratet for naturforvaltning har vedteke at det skal utarbeidast ein ny femårs forskrift for regulering av fisket etter anadrome laksefisk i vassdrag, gjeldande for perioden 2010 – 2014. Fylkesmannen orienterte i samarbeid med Norske Lakseelvar om prosessen og nasjonale føringar for utarbeiding av ny forskrift for representantar frå den lokale forvalting av lakse- og sjøaurestammene i fylket på Voss 20.10.09. Fylkesmannen haldt og møte om denne saka for det regionale fagrådet for lakse- og sjøaurestammar i Hordaland 03.11.09

Direktoratet har utarbeidd ein rad retningsliner for reguleringane, på grunn av at mange stammer av laks har for lite gytefisk og for høg mengd rømd oppdrettslaks. I hovudsak går desse ut på at uttaket av villaks må reduserast mange stadar, og at det må settast inn fleire tiltak for å fjerne rømd oppdrettslaks. Fylkesmannen meiner at retningslinene gjer eit klårt signal om at villaksen i ei rekke stammer i Hordaland må få eit betre vern mot overfiske og rømd oppdrettslaks. Direktoratet har og gjeve klåre føringar om at sjøaurestammene må få eit betre vern mot overfiske. Sjøaurestammer som har for lite gytefisk, grunna til dømes mykje lakselus i sjøen, skal difor ikkje fiskast på. På grunn av dette gjer Fylkesmannen mellom anna framlegg om å stogge alt elvefiske på sjøaure i det området av fylket kor det er størst problem med lakselus; i midtre Hardanger, mellom Øystese og Omvikedalen. I enkelte andre elvar kor lokal forureining har skapt stor fiskedød, er det gjort framlegg om heilt stogg i elvefisket i denne perioden.

Nytt av året er at Direktoratet for naturforvalting har opprettet Det vitenskapelige rådet for lakseforvaltning. Dette rådet har vurdert om dei siste års fiske i dei viktigaste laksestammane i landet er berekraftig. I Hordaland er som kjent laksefisket i dei fleste lakseelvane stengt. For dei der det framleis er eit fiske, har dei vurdert dette for å vere innanfor forsvarlege rammar i dei fleste av elvane, men i Oselva rår dei til moderert reduksjon av fisket. Rapporten frå dette rådet kan ein finne her: <http://www.dirnat.no/content.ap?thisId=500039033&language=0>

Av dei mindre elvane med laksestamme, som ikkje vitskapsrådet har vurdert, er fylkesmannen mest usikker på stoda for Fjæraelva. Laksestamma der er lita og smolten må vandre langt gjennom lakselusområda. Det er og mykje oppdrettslaks der. I sesongen 2009 har grunneigarane og fiskarane friviljug sett ut att all villfisk i den elva. I samråd med grunneigarane gjer difor fylkesmannen framlegg om stogg i fisket etter vill laks også i den elva. Det vil framleis vere tilte å fiske sjøaure og oppdrettslaks i elva.

Stoda i Vossavassdraget er serskilt. Førebelser har ikkje fylkesmannen gjort framlegg om endringar i fisketid i dette vassdraget, men vil vurdere dette serskilt i høyringstida i *Tiltaksutvalet for Vossolaksen*, der også grunneigarane er representerte. Det er ekstra kritisk for den ville laksestamma, og difor serskilt viktig å vere sikker på at fisket i vassdraget ikkje reduserer sjansen for å redde den. Samstundes er det sett i verk tiltak som vil endre stoda i løpet av virkningsperioden for forskrifa.

I elver som framleis har eit fiske etter vill laks og sjøaure, er det viktig at den lokale forvalting fylgjer med undervegs i fiskesesongen, og setter inn tiltak om det ser ut for å kunne verte for lite gytefisk etter at fiskesesongen er omme. Slik dynamisk fiskeregulering har vore nytta med hell i Daleelva og etterkvart og i fleire andre vassdrag i fylket. I nasjonale lakseelvar, som Etne, er det eit krav for å kunne ha ope for fiske, at det vert gjennomført ei vurdering av stoda etter halvendt sesong. Dette skal mellom anna gjerast med eit regneark utarbeidd for Direktoratet for naturforvaltning. Det skal og vere utarbeidd ein førehandsklarert handlingsplan som skal nyttast til å regulere fisket resten av sesongen. Ein slik plan skal leggast fram for fylkesmannen til godkjenning seinast ved utløpet av høyringsfristen for denne forskrifta, og er ein føresetnad for at ein kan ha den fisketida som fylkesmannen her har gjort framlegg om. Av di stoda for villlaksen i Oselva er usikker, og det er ynskje om ein relativt lang fiskesesong, set Fylkesmannen same krav til framlegging av handlingsplan der.

Direktoratet for naturforvaltning har opna for at det kan nyttast andre fangstreduserande tiltak enn innkorta fiskesesong. I Oselva og Etneelva vart det i fjar innført kvoteavgrensingar. Det er ein føresetnad at dette eller minst like virkningsfulle tiltak vert vidareført for å oppretthalde den fisketid som er gjeve i dette framlegget. Fylkesmannen går likevel inn for ei innkorting av fisketida i dei to elvane, av di dagens fisktider er lengre enn den maksimale ramma som Direktoratet for Naturforvaltning har sett på tre månader. Direktoratet har og sett som vilkår at fisket skal føre til redusert andel rømt oppdrettslaks. Dette må etter Fylkesmannen sin meining vegast opp mot innsats og høve for å sile vekk oppdrettsfisen etter sesongslutt, og fangstreduserande tiltak i oppvandringshindrande høler tidleg i sesongen.

Andel oppdrettslaks på gyteplassane vil vere ein viktig styringsparameter for forvaltinga av villaksstammene framover. Direktoratet for naturforvaltning har i sine retningsliner sagt at det skal settjast inn tiltak for å redusere innslag av rømt laks der det jamt er meir enn 5 % i gytestammene. I elver der det er jamt meir enn 20 % må det settast i verk strenge tiltak for at ein skal kunne oppretthalde eit fiske på vill laks. Denne faktoren kan gjere at Fylkesmannen kan kome til å redusere fiskesesongen på vill laks ytterlegare i løpet av forskriftsperioden om det viser seg at ein ikkje lukkast med å halde andel oppdrettslaks i gytestamma lågt nok.

Vi vil til slutt understreke at dette er eit høyringsframlegg. Vi ser fram til dialog med rettigheitshavarane, lokale fagråd og andre i høyringsperioden. Det er sers viktig å verne om fiskestammene og sørge for at dei produserar maksimalt, men der det er god og aktiv lokal

forvalting kan det utarbeidast andre reglar som i nokon grad kan være eit alternativ til innkorta fisketid.

Høyringsfrist vert sett til 20.01.10. Ny forskrift skal vere vedteke seinast 15.02.10. Meir bakgrunnsinformasjon om denne prosessen og dei retningslinene som gjeld vil verte lagt ut på våre internetsider: <http://www.fylkesmannen.no/fagom.aspx?m=1178>

Med helsing

Kjell Kvingedal e.f.  
seksjonssjef

Atle Kambestad  
fiskeforvaltar

Vedlegg: Framlegg til *Forskrift om opning av fiske etter anadrome laksefisk i vassdrag i Hordaland*, 3 sider

## **Framlegg til forskrift om opning av fiske etter anadrome laksefisk i vassdrag i Hordaland**

Med heimel i Lov av 15. mai 1992 nr. 47 om laksefisk og innlandsfisk m.m. § 33, jfr. kgl. res. av 27.11.92 om opning av fisket etter anadrome laksefisk og delegeringsforskrift fra Miljøverndepartementet av 24. februar 1993 har Fylkesmannen i Hordaland 15. februar 2010 fastsett følgjande forskrift om opningstider for fiske etter anadrome laksefisk i vassdrag:

### **§ 1**

Det er tillede å fiske anadrome laksefisk i følgjande vassdrag innafor dei oppgjevne datoane:

Kommune	Vassdrag	Laks	Sjøaure
Bergen	Storelva i Arna	01.07 – 15.09	01.07 – 15.09
Eid fjord	Eio	Forbode*	01.07 – 15.09
	Eid fjordvatnet	Forbode*	15.07 – 15.09
	Veig	Forbode*	15.07 – 15.09
	Simo	15.07 – 15.09	15.07 – 15.09
Etne	Etnevassdraget	01.06 – 31.08**	01.06 – 31.08**
	Fjæraelva	Forbode*	15.07 – 15.09
	Mosneselva	01.07 – 15.09	01.07 – 15.09
Fitjar	Kjær elva inkl. Storavatnet	01.07 – 15.09	01.07 – 15.09
Fusa	Hopselva	15.07 – 15.09	15.07 – 15.09
Granvin	Gravinsvassdraget	Forbode*	15.06 – 15.09
Kvinnherad	Bondhuselva	15.06 – 15.09	Forbode
	Blåelva	15.07 – 15.09	15.07 – 15.09
	Guddalselva	01.07 – 15.09	Forbode
	Uskedalselva	15.06 – 15.09	15.06 – 15.09
	Æneselva	15.06 – 15.09	Forbode
Lindås	Storelva på Natås	15.06 – 15.09	15.06 – 15.09
	Romarheim selva	01.07 – 15.09	01.07 – 15.09
Masfjorden	Andvikvassdraget	15.07 – 15.09	15.07 – 15.09
	Frøysetelva	15.06 – 15.09	15.06 – 15.09
	Hopevassdraget	15.07 – 15.09	15.07 – 15.09
	Matreelva	15.07 – 15.09	15.07 – 15.09
	Haugsdalselva	01.07 – 15.09	01.07 – 15.09
Modalen	Modalselva	15.07 – 15.09	15.07 – 15.09

Kommune	Vassdrag	Laks	Sjøaure
Odda	Opo	Forbode*	01.07 – 31.08
Os	Lønningdalselva	01.08 – 15.09	01.08 – 15.09
Os og Bergen	Osvassdraget	15.06 – 15.09**	15.06 – 15.09**
Osterøy	Loneelva	15.06 – 15.09	15.06 – 15.09
Ullensvang	Kinso opp til nedkant av Hølen	Forbode*	15.07 – 15.09
Vaksdal	Daleelva	01.07 – 15.09*	01.07 – 30.09
	Ekso	Forbode*	01.07 – 15.09
Voss	Vosso, offentlege rettar ovanfor Vangsvatnet	Forbode*	01.07 – 31.08
	Voss (Bulken-Evanger)	Forbode*	01.07 – 31.08
	Teigdalselva	Forbode*	01.07 – 15.09
	Bolstadelva	Forbode*	01.07 – 31.08

\* Fiske etter oppdrettslaks og regnbogeaure tillete i fisketida for sjøaure etter nærmere reglar utarbeidd av fiskerettshavarane

\*\* Rettighetshavarane har innført døgnkvotar på fangsten

## § 2

I følgjande vassdrag eller vassdragsdelar der det går anadrom fisk er det ikkje tillete å fiske:

- Bjoreio i Eidfjordvassdraget
- Kinso i Ullensvang frå og med utløpet av Hølen og oppover så langt laks kan vandre
- Tyssevassdraget i Samnanger
- Kjærrelva/Ådlandsvassdraget i Stord
- Ikkje offentlege rettar i Vosso ovanfor Vangsvatnet. I Vangsvatnet og Evangervatnet på Voss er det berre tillete å fiske innlandsfisk
- Jondalselva
- Steinsdalselva og Movatnet i Kvam
- Øysteseelva i Kvam
- Fosselva i Kvam
- Strandadalselva i Kvam
- Mundheimselva i Kvam
- Rosendalselvane i Kvinnherad
- Omvikdedalselva i Kvinnherad
- I tillegg alle elver og bekker med sjøaure i midtre Hardangerfjord frå og med Øystese til og med Omvikdedalen.

### § 3

Ved følgjande elveoser eller liknande vert det tillete å fiske etter laksefisk heile året:

- Hopsfossen i Nordåsvatnet i Bergen
- Utløpet frå kraftverket i Sima i Eidfjord
- Langfossen i Åkrafjorden i Etne
- Utløpet av Henangervassdraget i Sævareid i Fuså
- Utløpet av Skjelbreidvassdraget i Eikelandsosen i Fuså
- Utløpskanalen frå kraftverket i Austrepollen i Kvinnherad
- Utløpet frå kraftverket i Matre i Kvinnherad
- Furubergfossen i Maurangerfjorden i Kvinnherad
- Utløpet frå kraftverket i Matre i Masfjorden
- Utløpet frå kraftverket i Fotlandsvåg i Osterøy
- Utløpet fra BKK sitt kraftverk i Ulvik
- Utløpet frå Fossmark kraftverk i Vaksdal

### § 4

I dei vassdrag som fører anadrome laksefisk, men som ikkje er nemnde i § 1, 2 eller 3, er fiske tillete frå og med 01.07 til og med 15.09.

### §5

Fiske etter sjørøye er tillete i dei same periodane som etter sjøaure. Regnbogeaure er ikkje freda, men det er likevel ikkje tillete å fiske etter denne arten i lakse- eller sjøaureelver utanom dei fastsette fisketidene.

### § 6

Fylkesmannen i Hordaland kan i serlege tilfelle gje dispensasjon frå paragrafane i denne forskrift.

### §7

Fiske utanom dei fastsette fisketider er straffbart, jfr. Lov om laksefisk og innlandsfisk m.v. av 15.mai 1992 nr. 47, § 49.

### § 8

Forskrifta vert sett i verk frå 15. februar 2010. Samstundes vert forskrift av 15. februar 2008 om opning av fiske etter anadrome laksefisk i vassdrag i Hordaland oppheva.